

di optimismo argui potest; nam Dei optimi est optima producere, non quidem simpliciter, sed per comparationem ad finem; vel, ut loquitur s. Bonaventura, non absolute, sed in ordine, seu in relatione ad finem¹. Quocirca neque illud inde sequitur, quod cum inter optima unum non sit maius altero, omnia a Deo optimo producta debeant esse aequalia; nam « optimi agentis est producere totum effectum suum optimum, non tamen quod quamlibet partem totius faciat optimam simpliciter, sed optimam proportionem ad totum; tolleretur enim bonitas animalis, si quaelibet pars eius oculi haberet dignitatem: sic igitur et Deus totum universum constituit optimum, secundum modum creaturae; non autem singulas creatureas, sed unam alia meliorem² ». Hinc s. Bonaventura: « Quod obiicitur, quod Deus dat unicuique quod melius est, dicendum, quod Deus non dat unicuique simpliciter melius, quia tunc non faceret res ordinatas, sed aequaliter perfectas; et hoc repugnaret perfectioni, quia si omnia essent aequalia, non essent ordinata, ut dicit Augustinus lib. 83 Qq., q. 41. Cum ergo dicitur quod Deus dat unicuique quod melius est, hoc intelligendum est secundum exigentiam ordinis et naturae³ ».

XXI. OPTIMUM OPPONITUR PESSIMO. Etenim eo magis aliquid malum est, quo eminentius est bonum, cui opponitur. Huius rei exemplum afferit s. Thomas: « Dicendum, quod virtutis opponitur aliquod peccatum uno quidem modo principaliter et directe, quod scilicet est circa idem obiectum, nam contraria circa idem sunt; et hoc modo oportet, quod maiori virtuti opponatur gravius peccatum. Sicut enim ex parte obiecti attenditur gravitas peccati, ita etiam maior dignitas virtutis; utrumque enim ex obiecto speciem sortitur; unde oportet quod maximae virtuti directe contrarietur maximum peccatum, quasi maxime ab eo distans in eodem genere⁴ ».

¹ In lib. I Sent., Dist. XLIV, a. I, q. 2 resol., et lib. II, Dist. XXIII, a. I, q. 1 ad arg.

² S. Thom., I, q. XLVII, a. 2 ad 4. Vid. p. 230.

³ In lib. II Sent., Dist. I, p. I, a. I, q. 1 ad arg.

⁴ 1^a 2^{ae}, q. LXXIII, a. 4 c. Cf Qq. dispp., De Malo, q. II, a. 10 c.

P

DISTINCTIONES

I. PARS ALIQUOTA—NON ALIQUOTA. Illa est, quae multoties repetita totum absimit; e. g., binarius respectu denarii, quinquies enim repetitus absimit denarium. Haec vero est, quae nequit adaequare totum; e. g., ternarius respectu denarii. Iam, adnotante s. Bonaventura, pars aliqua est, cui propriissime convenit intentio partis, quia nempe « venit in constitutionem alicuius secundum certam et determinatam mensuram, ita quod aliquoties sumta reddit suum totum¹ ».

II. PARS ESSENTIALIS—PARS QUANTITATIVA. *Partes quantitatiae* sunt illae, in quas dividitur numerus, et magnitudo. *Partes essentials* dicuntur vel materia et forma, ex quibus totum naturale constituitur, vel genus et differentia, ex quibus species rei existit².

III. PARS INTEGRALIS—POTENTIALIS—SUBJECTIVA. *Partes integrales* sunt vel ipsae partes *quantitatiae*, ex quibus simul collectis totum quantum constituitur, uti *paries*, *tectum*, *fundamentum* sunt *partes domus*³; vel quae non quidem ad *essentialiam*, sed ad *integritatem*, seu *perfectionem* rei inserviunt; cuiusmodi, e. g., dicuntur partes alicuius virtutis cardinalis ea, quae *necessae est concurrere ad perfectum actum virtutis illius*⁴, puta *circumspectio* est pars *integralis prudentiae*. « Assignantur ei (virtuti) partes quasi *integrales*, cum scilicet partes alicuius virtutis ponuntur aliqua, quae exiguntur ad virtutem, in quibus perfectio virtutis consistit; et hae partes proprie loquendo non nominant per se virtutes, sed conditions unius virtutis *integrantes ipsam*⁵ ». *Pars subjectiva* est inferius respectu superioris, cui illud *subiicitur*, *sicut bos et leo sunt partes animalis*; atque ita etiam *partes subjectivae virtutis* dicun-

¹ In lib. III Sent., Dist. VII, dub. 1.

² S. Thom., Qq. dispp., q. un. *De An.*, a. 10 c.

³ 2^a 2^{ae}, q. XLVIII, a. un. c.—⁴ Ibid.

⁵ In lib. III Sent., Dist. XXXIII, q. III, a. I, sol. 1.

*tur species eiusdem diversae*¹; e. g., sobrietas est pars *subjectiva temperantiae*. Denique *partes potentiales* sunt qualitates, quae rei inhaerent, et per quas suam vim agendi explicat; atque ita appellantur, quia per unamquamque earum res suam potestatem non totam, sed tantum ex aliqua parte explicat; e. g., *nutritivum*, et *sensitivum* sunt *partes potentiales animae*². Hoc modo « *partes potentiales* alicuius virtutis dicuntur virtutes adiunctae, quae ordinantur ad aliquos secundarios actus, vel materias, quasi non habentes totam potentiam principalis virtutis³; vel « *quae participant aliquid de modo qui principaliter et perfecte invenitur in aliqua virtute*⁴; e. g., *pietas*, *observantia* etc. sunt *partes potentiales iustitiae*.

IV. PARTICIPARE PROPRIE—IMPROPRIE. *Participare* sensu proprio acceptum significat *quasi partem capere*. Hinc 1^o « quando aliquid particulariter recipit id, quod ad alterum pertinet universaliter, dicitur *participare* illud; sicut homo dicitur *participare animal*, quia non habet rationem animalis secundum totam *communitatem* »; 2^o « *Subiectum* *participat accidens*, et *materia formam*, quia *forma substantialis*, vel *accidentalis*, quae *de sui ratione communis est*, determinatur *ad hoc*, vel *ad illud subiectum* »; 3^o « *Effectus* dicitur *participare suam causam*, et *praecipue quando non adaequat virtutem suaee causae*; puta si dicamus *quod aer participat lucem solis*, quia non recipit *eam in ea claritate qua est in sole*⁵ ». *Participare improprie*, seu *secundum aliquam analogiam* dicitur illud, *quod ex parte*, seu *secundum imperfectam similitudinem* *habet aliquid*, *quod in alio proprie et perfecte existit*. Hoc modo *creaturae participant Divinam Bonitatem*⁶.

V. PARTICIPALITER—ESSENTIALITER⁷.

VI. PARTICIPATIVE — NOMINALITER. *Vox*, quae *instar participii usurpatur*, *participative*, seu *potius participaliter*; illa vero, quae tamquam nomen accipitur, *nominaliter*

¹ 2^a 2^{ae}, loc. cit.—² *Ibid.*—³ *Ibid.*

⁴ In lib. III Sent., loc. cit.

⁵ Super Boet. *De Hebd.*, lect. I.

⁶ In lib. II Sent., Dist. XVIII, q. I, a. 6 ad 1. Huc vides illam loquendi rationem, qua omnia esse *participationes Divinae Essentialiae* dicuntur, pantheistarum sententiae nihil omnino prodesse. Vid. p. 109.

⁷ Vid. p. 109-110.

ter sumi dicitur. E. g., haec vox *adolescens* *participaliter sumta* indicat in universum quidquid aetate augetur et vigescit: *Nominaliter* vero innuit aetatem, quae pueritiam immediate sequitur.

VII. PATI PROPRIE—MINUS PROPRIE—COMMUNITER. *Proprius pati* dicitur id, a quo aliquid removetur sibi conveniens vel secundum naturam, vel secundum propriam inclinationem, et aliquid contrarium in ipsum imprimitur, puta cum homo aegrotat, aut tristatur: « *Ad rationem passionis requiritur quod qualitas introducta sit extranea, et qualitas abiecta sit connaturalis*; quod contingit ex hoc, quod passio importat quamdam victoriam agentis super patiens; omne autem quod vincitur, quasi trahitur extra terminos proprios ad terminos alienos; et ideo alterationes, quae contingunt praeter naturam alterati, magis propriæ dicuntur passiones¹. *Minus propriæ*, illud, a quo aliquid abiicitur, et aliud recipitur sive sit ei conveniens, sive non: Hoc sensu dicitur *pati homo* non solum cum aegrotat, sed etiam cum sanatur, atque non solum cum tristatur, sed etiam cum laetatur. *Communiter*, quatenus ex potentia transit ad actum, nempe quatenus recipit illud, ad quod erat in potentia: Hoc sensu *pati* accipitur pro qualibet mutatione, etiamsi pertineat ad perfectionem naturae; atque proinde *transmutationem sensibilem* in *sui ratione non includit*; unde ipsum nostrum intelligere dici potest quædam *passio*².

VIII. PATIBILIS QUALITAS—PASSIO. Pertinent ad tertiam speciem *qualitatis*³. Scilicet sunt qualitates, quae quamdam perturbationem in substantia producent, vel ob perturbationem in substantia productam in eodem subiecto oriuntur; e. g., metus, qui statum hominis perturbat, et pallor, qui ex metu, qui statum hominis perturbat, in eius vultu efficitur. Iam, si hæc qualitates firmæ sunt, et diuturnæ, *patibiles qualitates*, puta pallor *ex longa aegritudine ortus*; sin cito diffuant, *passiones* dicuntur, puta pallor, qui ex metu dignitur. *Patibilis qualitas* ita nuncupatur, quia ipsa proprie substantiam *qualem* efficit; e. g.,

¹ In lib. III Sent. Dist. XV, q. II, a. I, sol. 1 c.

² I, q. LXXIX, a. 2 c., et q. XCVII, a. 2 c.

³ Vid. litt. Q.

ex firme et constante rubore aliquis ruber dicitur, non autem si quis verecundia rubeat, ruber denominatur. Huiusmodi qualitates proprie in rebus corporeis inveniuntur, et, si in animam quoque cadunt, id evenit, quatenus haec corpus substantialiter sibi coniunctum habet. Proinde inveteratum odium Scholastici appellant *qualitatem patibilem*; brevem iram vocant *passionem*.

IX. PERFECTIO QUODAM ENTITATEM—QUODAM VIRTUTEM—QUODAM FINEM. *Perfectio entitatis* respicit rem in sua substantia; atque est *forma totius, quae ex integritate partium consurgit*¹. Nempe illud dicitur *quodam entitatem* perfectum, cui nihil deest ad sui essentiam, neque ad sui integritatem. Hoc modo dicitur homo *perfectus* in sua specie, ex hoc quod constat ex anima rationali, et corpore: *perfectus* corporis integritate, si nulla ei desit corporis pars: et iustum habeat staturam, membrorumque proportionem. *Perfectum secundum virtutem* dicitur illud, quod bene se habet in operibus sibi propriis; nempe quod nec plus, nec minus habet, quam quod debet habere, ut sua opera perficiat. Hoc sensu dicitur *perfectus* medicus, si ei non deficiat aliquid, quod pertineat ad speciem propriae virtutis². Secundum hunc perfectionis modum ultimur hoc nomine etiam in malis, puta cum dicimus perfectum calumniatorem et latronem³, cum isti nullo modo deficiunt ab eo, quod eis competit quatenus sunt tales. Neque mirum est, si in his, quae defectum indicant, utamur nomine *perfectionis*; sic enim latro, calumniator etc. se habent in suis operationibus, licet malis, sicut boni in bonis. Denique *perfectionem finis* dicitur habere res, quae ita est comparata, ut finem, propter quem instituta est, consequatur; sicut homo cum consequitur beatitudinem. Hinc qui consequitur finem in malis, potius *deficiens* dicitur, quam *perfectus*, quia malum est privatio debitae perfectionis. Nisi quod cum finis sit quoddam ultimum, ideo per quamdam similitudinem transferimus nomen *perfectionis* ad ea, quae pervenient ad ultimum, licet sit malum. Hoc sensu dicitur aliquid *perfecte* perdi, vel cor-

¹ I, q. LXXIII, a. 1 c.

² In lib. V Met., lect. XVIII.

³ Vid. p. 47.

rumpi, quando nihil deest de corruptione, vel perditio ne rei¹.

X. PERFECTIO SIMPLICITER SIMPLEX—SIMPLEX—SECUNDUM QUID. Prima est *perfectio*, quae in sua ratione omnem excludit defectum, necnon oppositionem cum maiori, aut aequali perfectione; e. g., sapientia. Altera est, quae omnem excludit defectum, non autem oppositionem cum alia sibi aequali; e. g., *Paternitas Divina*, quae nihil omnino imperfectum continet, sed tantum cum *Filiatione* pugnat. Tertia est, quae et in se aliquid imperfecti admixtum habet, et cum alia nobiliiori consociari non potest, e. g., esse corpus.

XI. PERMISSIO LEGALIS—CAUSALIS. *Permissio legalis* ea est, qua aliquid, tamquam licitum, subditorum nutui a legislatore relinquitur. *Permissio causalis*, qua aliquid a causa, quae posset impedire, non impeditur. Hinc patet Deum mala moralia permettere non primo, sed altero modo; non enim tamquam legislator sanctissimus aliquid permittit malum, sed solum quatenus cum possit mala impedire, ea non impedit. Neque hoc modo *permittere* idem est, ac *consentire*. Nam, « *permittere* malum est dupliciter; aut non cohibendo manum vel animum nec in facto, nec in retributione, et sic *consentire* est; vel non cohibendo manum, sed tamen puniendo transgressorē, et arguendo continue, et sic non *consentit*; et hoc modo Deus *permittit*, et non *consentit*² ».

XII. PER SE—A SE. *Per se* existit id, quod non habet esse suum in alio tanquam in subiecto; quare *per se* existit quaelibet *substantia*. Huic existendi modo opponitur ille, quo res *inhaesive* alteri inesse dicitur, et qui *accidentium proprius* est³. *A se* id, quod nulla prorsus indiget causa, ut existat; et hoc ad solum Deum pertinet. Hinc illae voces oriuntur, *Perseitas—Aseitas*. *Perseitas* negat tantum dependentiam a subiecto, cui aliquid inhaerere debeat, ut existere possit; *Aseitas* negat etiam dependentiam a quavis causa producente.

XIII. PER SE—PER ACCIDENS. 1º *Per se* alicui convenire dicitur id, quod ex internis eius principiis; *per acci-*

¹ 1^a 2^{ae}, q. LV, a. 3 ad 1.

² S. Bon., In lib. I Sent., Dist. XLVII, a. I, q. 3 ad arg.

³ Vid. p. 14.

dens, quod quasi fortuito illi convenit; e. g., *per se* convenit homini esse animal; *per accidens* esse album: « Quaecumque, ait s. Thomas, per se insunt alicui, vel sunt de essentia eius, vel consequuntur essentialia principia . . . Omne, quod inest alicui per accidens, cum sit extraneum a natura eius, oportet quod conveniat ei ex aliqua exteriori causa¹ ». Adnotante autem eodem sancto Doctore, *per se* aliquid attribuitur alicui non solum positive, *sicut igni attribuitur ferri sursum*, sed etiam *ratione remotionis*, « per hoc scilicet quod removentur ab eo illa, quae nata sunt contrariam dispositionem inducere »; e.g., hoc modo dicimus universale esse *per se* incorruptibile: « non enim dicitur universale incorruptibile, quasi habeat aliquam formam incorruptionis, sed quia non convenienter ei secundum se dispositiones materiales, quae sunt causae corruptionis in individuis² ». Rursus « nihil prohibet aliquid inesse per accidens alicui secundum se sumto, quod eidem inest per se, addito alio; sicut homini per accidens inest moveri, per se vero homini in quantum est currens³ ». 2º *Per se* alicui convenit illud, quod ad ipsum pertinet, qualibet facta positione; e. g., esse ubique *per se* convenit Deo; quia « quaecumque loca ponantur, etiamsi ponerentur infinita, praeter ista, quae sunt, oportet in omnibus esse Deum, quia nihil potest esse, nisi per ipsum ». *Per accidens* autem convenit alicui illud, quod de ipso dicitur *propter aliquam suppositionem factam*, e. g., « granum milii esset ubique, supposito, quod nullum aliud corpus esset⁴ ». 3º *Per se* idem est ac *propter se*, vel *directe*. *Per accidens* idem est, ac *propter aliud et indirecte*: e. g., *Theologia per se seu principaliter agit de Deo, per accidens de creaturis, secundum quod referuntur ad Deum, ut ad principium vel finem⁵*. Ita etiam virtutes appetuntur *propter se*, « in quantum habent in seip sis aliquam rationem bonitatis, etiamsi nihil aliud boni per eas nobis accideret »; et *propter aliud*, « in quantum scilicet nos perducunt in aliquod bonum perfectius⁶ ».

¹ Qq. disp., *De Pot.*, q. X, a. 4 c.

² Qq. disp., *De Ver.*, q. I, a. 5 ad 15.

³ Ibid., q. XII, a. 11 ad 1.—⁴ I, q. VIII, a. 4 c.

⁵ I, q. I, a. 3 ad 1. Vid. p. 96-97.

⁶ 2^a 2^{ae}, q. CXLV, a. 1 ad 1.

Hac etiam ratione « quaedam sunt in genere per se », scilicet « quae participant essentiam completam illius generis »; alia vero *indirecte*, seu *per reductionem*¹. 4º Quomodo hae voces significant diversa genera causarum, iam alibi explicatum est². 5º *Per se* compositum est illud, quod coalescit ex rebus naturalem ordinem inter se habentibus, et eiusdem generis: *Per accidens* compositum dicitur id, quod constat ex pluribus, quae vel naturalem ordinem inter se non habent, vel ad diversam categoriam spectant; e. g., homo est aliquid compositum *per se*, constat enim ex anima et corpore, quae eiusdem sunt categoriae, cum utrumque ad genus substantiae pertineat, et naturalem ordinem inter se habent, ita ut unam substantiam completam constituant. Domus vero est aliquid compositum *per accidens*, exurgit enim ex pluribus artificioso ordine inter se connexis. Item, aqua frigida est aliquid compositum *per accidens*, constat enim ex aqua et frigore, quae licet habeant invicem naturalem ordinem, sunt tamen diversae categoriae, cum aqua sit substantia, frigus sit qualitas. 6º Denique, *per se loquendo* idem est ac *absolute*, vel *in universum loquendo*; *per accidens* idem est ac secundum aliquam rationem, vel aliqua ex parte. E. g., anima brutorum *per se* est indivisa³; *per accidens* in animalibus imperfectis est divisibilis, nempe ratione extensi, quod informat⁴.

XIV. PERSONA—SUPPOSITUM⁵.

XV. PERSONALITER—SIMPLICITER⁶.

XVI. PHYSICE—LOGICE⁷.

XVII. PHYSICUM PUNCTUM—MATHEMATICUM. *Punctum mathematicum* est illud, quo nihil minus in extensione excogitari potest, idest cuius nulla pars est. *Punctum vero physicum* est illud, quod licet naturaliter in partes dividi nequeat, tamen nostrae cogitationi partes, in quas dividitur, exhibet.

¹ S. Bonav., *In lib. II Sent., Dist. XXIV*, p. 1, a. II, q. I ad arg. Vid. p. 96-97.

² Vid. p. 63.—³ Vid. s. Thom., *Contr. Gent.*, lib. I, c. 42.

⁴ Qq. disp., *De Pot.*, q. III, a. 12 ad 5. Cf Sanseverino, *Elem. seu Instit. Phil. Christ.*, vol. II, *Cosmol.*, c. IV, a. 3, p. 373 sqq, Neapoli 1876.

⁵ Vid. *Suppositum*, litt. S.—⁶ Vid. *Simpliciter*, litt. S.

⁷ Vid. p. 194.

XVIII. POSITIVE—NEGATIVE. 1º *Positivum* distinguitur contra *negativum*, prout *reale* contra id, quod non est *reale*. 2º *Positive* alteri opponitur illud, quod eius contraria formam habet; siquidem « dicuntur contraria, secundum quod in utroque aliquid positive consideratur¹ »; «contrarietas enim cum sit differentia secundum formam² », sequitur ut « oppositio contrarietas sit ex parte positio- nis in utroque³ ». *Negative* autem illud, quod neque illam formam habet, neque formam ipsi contrariam. E. g., *negative bonitatem civilem* dicitur habere « agrestis, qui extra civilem vitam est, et per consequens actiones eius neque bonae, neque malae sunt civiliter, in quantum non sunt ordinatae ad civile bonum⁴ ». Item *negative*, vel *positive infidelitas* a Theologis consideratur: « Infidelitas duplíciter accipi potest. Uno modo secundum puram negationem, ut dicatur infidelis ex hoc solo, quod non habet fidem. Alio modo potest intelligi infidelitas secundum contrarietatem ad fidem; qua scilicet aliquis repugnat auditui fidei, vel etiam contemnit ipsam⁵ ». 3º Aliquid alterius actioni resistere dicitur *positive*, vel *negative*, prouel contrariam ei obiicit actionem; vel tantum defectum habilitatis ad illam in se suscipiendam. 4º Aliquando *positive* et *negative* idem significant, ac *directe* et *indirecte*, nempe cum adhibentur ad diversam rationem significandam, qua quis damnum alteri infert. E. g., *positive*, vel *negative*, seu *directe*, vel *indirecte* potest quis esse *causa iniustae acceptio- nis*: « Directe quidem, quando inducit aliquis alium ad accipendum; et hoc quidem tripliciter. Primo quidem modo ex parte acceptio- nis, movendo ad ipsam acceptio- nem; quod quidem fit praecipiendo, consulendo, consentiendo expresse, et laudando aliquem quasi strenuum de hoc, quod aliena accepit. Alio modo ex parte ipsius ac- cipientis; quia scilicet eum acceptat, vel qualitercumque ei auxilium fert. Tertio modo ex parte rei acceptae; quia scilicet particeps est furti, vel rapinae, quasi socius maleficii⁶ ». *Negative*, seu *indirecte*, « quando aliquis non impedit, cum possit, et debeat impedire; vel quia subtrahit

¹ In lib. II Sent., Dist. XL, q. I, a. 5 sol.

² 1^a 2^{ae}, q. XXXV, a. 4 c.

³ In lib. II Sent., loc. cit.

⁴ Ibid. ad l. — 5 2^a 2^{ae}, q. X, a. 1 c.

praeceptum, sive consilium impediens furtum, vel rapinam; vel quia subtrahit suum auxilium, quo posset obser- stare; vel quia occultat post factum⁷ ». 5º *Positivum*, vel *negativum* diversas attributorum species etiam significant. *Positiva attributa* sunt ea, quae in sui conceptu perfectionem involvunt, puta sapientia, iustitia etc. *Negativa*, quae perfectionem denotant, prout aliquod vitium remo- vent ab illo, de quo praedicantur. Qua in re monemus 1º negationem vel ad originem nominis spectare, vel ad significationem. Negatio vi originis illa est, quae ex analy- sis vocis coalescentis ex particula non derivatur; e. g., *infinitas* quasi idem est ac non esse finitum. Negatio vi significationis oritur ex negativo sensu vocis ceteroquin pos- tivae; e. g., *simplicitas* idem est ac non esse multiplex, etc. 2º Huiusmodi distinctionem attributorum etiam cum de Divinis perfectionibus sermo est, admitti solere, non quidem ita ut negativa attributa sint in Deo contraria af- firmantibus, sed ita ut excellentiam perfectionis quovis defectu immunis significant; siquidem in hac vita non pos- sumus aliter Deum cognoscere, quam per creaturas, removendo ab Ipso omnes imperfectiones creaturarum, et harum perfectiones magis ac magis extendendo; quocirca attributa negantia abundantiam et excessum praeseferunt, quippe quae Deum supra omnia, quae sunt, esse ostendunt⁸.

XIX. POSSIBLE INTRINSECE—EXTRINSECE. Dicitur possi- ble intrinsece, vel absolute, et secundum seipsum illud, cuius termini nullam ad invicem repugnantiam habent; dum e contrario impossibile intrinsecum, absolutum, secundum seipsum dicitur ex discohaerentia terminorum, seu cuius termini sibi invicem repugnant; et quoniam discohaerentia terminorum est in ratione alicuius oppositionis, in qua includitur affirmatio et negatio, sequitur, ut in omni tali im- possibili implicetur affirmationem et negationem esse simul. Hac ratione dicimus possibile quod non est impossibile esse, et impossibile dicimus quod necesse est non esse⁹. Extrinsece autem, vel respective possibile aliquid dicitur

¹ 2^a 2^{ae}, q. LXII, a. 7 c.

² Vid. s. Damasc., *De Fide orth.*, lib. I, c. 4.

³ « Quod necesse est non esse, impossibile est, et conversim »; s. Anselm., *Cur Deus homo*, c. 18.

quatenus subditur alicui potentiae, sive *activae*, « ut si dicamus possibile esse aedificatori, quod aedificet »; sive *passivae*, « ut si dicamus possibile esse ligno quod comburatur ». E contrario, dicitur *respective impossibile* illud, « quod, quantum in se est, non habet rationem impossibilis, sed in ordine ad aliquid »; nempe « propter defectum potentiae, vel ex seipsa, quia videlicet ad illum effectum non potest se extendere . . . , vel cum potentia alicuius impeditur, aut ligatur¹ ». Quare « uno modo dicitur impossibile, quod nullo modo fieri potest. Et impossibile dicitur, quod natum est fieri, licet elevatum sit supra possibilitatem agentis, aut patientis² ».

Ex his patet 1^o nihil dici posse *respective* possibile, nisi sit *intrinsece* possibile³; quocirca possilitas *intrinseca* vocatur etiam *fundamentalis*. 2^o Omnia, quae *respective* sunt impossibilia apud causas inferiores, esse possibilia apud Deum. Hinc « sapientes mundi propter hoc stulti vocantur, quia quae secundum causas inferiores sunt impossibilia, simpliciter et absolute impossibilia iudicabant, etiam Deo⁴ ».

XX. POSSIBILE SIMPLICITER — EX SUPPOSITIONE. Illud idem, quod *simpliciter*, seu *absolute* est possibile, quia in se nullam includit repugnantiam, evadit *hypothetice impossibile* ex aliqua suppositione facta. Hoc modo impossibile est, ut ea, quae a Deo sunt praevisa, non eveniant⁵.

XXI. POTENTIA — POTENTIALITAS. *Potentialitas*, seu *simpliciter potentia* significat *non existentiam rei*, eiusque indifferentiam ad *esse* vel *non esse*: *Potentia* autem, seu *facultas*, vel *potes* denotat illud, quod iam suum *esse* habet, et per ipsum ad actionem ordinem habet. Quare illud, quod est *potentiale*, nullo modo est⁶. *Potentia* vero non est *actu secundo*, qui, ut alibi diximus⁷, significat actionem; quia existere et intelligi potest sine actione, cuius ipsa principium est; sed est *actu primo*, qui signi-

¹ Qq. dispp., *De Pot.*, q. I, a. 3 c., et q. III, a. 14 c. In lib. I Sent., Dist. XLII, q. II, a. 3 sol.

² B. Alb. M., *De motibus progressivis*, tract. I, c. 4.

³ Vid. p. 183.

⁴ *De Pot.*, q. I, a. 4 ad 1. Vid. I, q. XXV, a. 3 c.

⁵ III, q. XLVI, a. 2 c. vid. p. 219-220.

⁶ Pag. 11.—⁷ Pag. 42.

ficat *esse*; nam intelligi non potest sine *esse*, quod est principium ipsius potentiae.

Hinc Leibnitius, aliquique philosophi refelluntur, qui facultates animae sine *actu*, seu operatione, aliquid merum possibile, et abstractum esse opinantur.

XXII. POTENTIA ACTIVA — PASSIVA. *Potentia activa* est principium agendi in aliud: *Passiva* est principium patienti ab alio¹. Scilicet, quaelibet potentia expostulat, ut ad operationem ordinem habeat. Iam, *potentia*, quae sua operatione aliquod obiectum transmutat, est *activa*; e contrario, *potentia*, quae ab aliquo obiecto movetur ad suam operationem eliciendam, est *passiva*². « *Potentia activa* est principium transmutandi illud. *Potentia passiva* est principium transmutandi ab alio³ ».

XXIII. POTENTIA — HABITUS⁴.

XXIV. POTENTIA — IMPOTENTIA. Spectant ad secundam speciem qualitatis. Nempe, proclivitas, vel imbecillitas superaddita facultati agendi, per quam substantia faciliter, vel difficiliter ea operari potest, quae illius facultatis obiectum sunt, aut resistere iis, quae illius exercitacionem impediunt, *potentia*, vel *impotentia* vocatur; e. g., visus in iuvene *potentiam*, in sene *impotentiam*, sive debilem potentiam habet: « *Potentia naturalis*, prout dicit modum existendi naturalis potentiae in subiecto (*id est facultatis agendi*); secundum quem dieitur subiectum facile, vel difficile ad aliquid agendum . . . , dicit modum qualitatis; et est generaliter in secunda specie qualitatis, ut patet, cum dicitur cursor, et pugillator, quorum utrumque dicit facilitatem, quae sequitur modum existendi potentiae gradiendi, et resistendi, sive agendi in subiecto⁵ ».

XXV. POTENTIA LOGICA — PHYSICA. *Potentia physica* « dicit actualiter potentiam in re, quae signatur ad alterum ordinari⁶ », seu ad realem et positivum effectum. *Potentia autem logica* significat tantum aliquid *non esse* in se

¹ I, q. XXV, a. 1 c.

² Vid. s. Thom., Qq. dispp., *De Ver.*, q. XVI, a. 1 ad 13. Quomodo potentia activa attribuenda sit Deo, explicat sanctus Doctor, Qq. dispp., *De Pot.*, q. I, a. 1.

³ S. Bonav., *In lib. I Sent.*, Dist. XII, a. 1, q. 4 resol.—⁴ Vid. p. 159-60.

⁵ S. Bon., *In lib. I Sent.*, Dist. III, p. 2, a. 1, q. 3 resol.

⁶ S. Bon., *In lib. I Sent.*, Dist. XLII, a. 1, q. 4 resol.

impossibile quasi contradictionem implicans, e. g., *logica* est potentia, qua creatureae in nihilum a Deo redigi possunt¹, non autem *physica*; siquidem « tendere in nihilum non est proprius motus naturae, qui semper est in bonum² ».

XXVI. POTENTIA NATURALIS — SUPERNATURALIS — OBEDIENTIALIS. *Potentia naturalis* est quae ordinatur ad operationes proprias cuiusque naturae creatae, seu quae eius vires non excedunt. Haec potentia vocatur *vitalis*, si operatio producitur, vita concurrente; puta intellectus, sensus, facultas nutritrix etc.; sin vero, vita non concurrente, vocatur *simpliciter naturalis*; puta potentia illuminandi in sole. E contrario, *potentia supernaturalis* est quae ordinatur ad operationes superantes naturae vires; e. g., potentia intellectus creati ad *visionem intuitivam Dei*. Iam, si haec potentia spectetur, quatenus pendet a Deo, qui huiusmodi virtutem largitur creaturis, dicitur *simpliciter supernaturalis*; sin in creatura, quatenus « in creatura fieri potest quidquid in ea fieri voluerit Creator³ », dicitur *potentia obedientialis*: *Obedientialis*, quia « tota creatura obedit Deo ad suscipiendum in se quidquid Deus voluerit⁴ »: *Potentia*, quia quaedam non repugnantia, seu aptitudo naturalis agnoscenda est in creaturis ad id, quod virtute illa supernaturali augeantur⁵. Hinc *potentia obedientialis* definitur: Capacitas naturarum creatarum accipiendi a Deo virtutem supernaturalem, per quam quidquam, quod vires earum excedit, agere possint.

XXVII. POTENTIA OBIECTIVA — SUBIECTIVA. *Potentia obiectiva* est mera rei possibilitas, seu non repugnantia ad existendum, e. g., capacitas existendi in altero mundo⁶. *Subiectiva* est quaedam habilitas subiecti ad aliquam formam in se recipiendam; e. g., pelluciditas aëris ad lumen in se suscipiendum; haec enim est capacitas admittendi lumen in se⁷. *Potentia subiectiva* denotat aliquid positivum

¹ S. Thom., *Qq. disp., de Pot.*, q. V, a. 3; vid. p. 246.

² *Ibid.*, a. 1 ad 16. Cf p. 236.

³ *Qq. disp., De Ver.*, q. VIII, a. 12 ad 4.

⁴ *Qq. disp., De Virt.*, q. I, a. 10 ad 13.

⁵ *Qq. disp., De Pot.*, q. I, a. 3 ad 4.

⁶ Inde colligis potentialitatem, potentiam logicam, et potentiam obiectivam fere idem significare.

⁷ Vid. p. 41.

in subiecto, puta idoneitatem ad formam: *Obiectiva* vero nihil positivum praesefert, sed solam in Deo foecunditatem producendi quodlibet. Sic possibilitas alterius mundi nihil importat *actu* in altero mundo, sed solam designat Divinae Potentiae foecunditatem, a qua possit e potentia ad actum reduci. Vocatur autem potentia *obiectiva*, vel quia illud, quod est in *potentia obiectiva*, obiectum solius Divinae omnipotentiae est; vel quia obiectum cognitionis esse potest. *Potentia subiectiva* iterum vel est mere receptiva, si tantammodo formam recipiendi capacitatem praesefert; quo modo corpus humanum est in potentia *subiectiva* respectu animae rationalis; vel etiam ad productionem formae, quae recipitur, quodammodo concurrit, quatenus haec ab illa educitur; quo modo, e. g., lignum est in potentia *subiectiva* respectu ignis.

XXVIII. POTENTIA ORDINATA — ABSOLUTA. Sunt varii modi, quibus Dei Potentia a nobis concipitur. Nempe dicitur Deus posse de potentia ordinata illud, « quod attribuitur sibi in ordine ad sapientiam, et praescientiam et voluntatem Eius¹ ». Atque haec potentia *ordinata* appellatur vel *ordinaria*, vel *extraordinaria*, prout versatur circa ea, quae vel secundum, vel praeter naturae cursum fiunt. Dicitur autem Deus posse de *potentia absoluta* illud, quod attribuitur *potentiae secundum se consideratae*²; quo modo a Deo fieri potest quidquid contradictionem non implicat, seu *omne illud, in quo salvari potest ratio entis*³. Quocirca 1^o potentia absoluta non nisi rei possibilitatem respicit. 2^o Deus « potentia absoluta potest facere alia, quam quae praescivit et praeordinavit se facturum⁴ ». 3^o « Absolutum et regulatum non attribuuntur Divinae Potentiae, nisi ex nostra consideratione, quae Potentiae Dei in se consideratae, quae absoluta dicitur, aliquid attribuit, quod non attribuit Ei secundum quod ad sapientiam comparatur, prout dicitur *ordinata*⁵ ».

XXIX. POTENTIA PROXIMA — REMOTA. *Potentia proxima* est ea, quae unica agentis actione, seu, ut s. Thomas inquit, *statim*⁶ potest ad actum reduci: *Potentia remota*,

¹ In lib. III Sent., Dist. I, q. II, a. 3 sol.

² Loc. cit.—³ I, q. XXV, a. 5 ad 1.

⁴ *Ibid.*—⁵ *Qq. disp., De Pot.*, q. I, a. 5 ad 5.

⁶ In lib. II Sent., Dist. XIX, q. I, a. 2 sol.